



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 789, Datë 15.04.2021

“Mbi autorizimin e përqendrimit të realizuar nëpërmjet krijimit të një ndërmarrje te përbashkët, me funksione të plota, nga shoqëritë MHP Management und IT Beratung GmbH dhe TransnetBW GmbH”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Z. Eduard YPI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 15.04.2021, shqyrtoi çështjen me:

Objekti: Autorizimi i përqendrimit të realizuar nëpërmjet krijimit të një ndërmarrje të përbashkët, me funksione të plota, nga shoqëritë MHP Management und IT Beratung GmbH dhe TransnetBW GmbH.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit”; Formulari i njoftimit të përqendrimit dhe Udhëzimi “Mbi procedurat e thjeshtuara për trajtimin e disa përqendrimeve”.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet krijimit të një ndërmarrje të përbashkët, me funksione të plota, nga shoqëritë MHP Management und IT Beratung GmbH dhe TransnetBW GmbH.

VËREN SE :

Transaksioni dhe procedura

Pranë Autoritetit të Konkurrencës, është depozituar njoftimi lidhur me krijimin e një ndërmarrje të përbashkët, me funksione të plota, nga shoqëritë MHP Management und IT Beratung GmbH dhe TransnetBW GmbH.

Pala 1: MHP Management und IT Beratung GmbH është një shoqëri konsulence, e themeluar sipas legjislacionin gjerman, e cila kryen të gjitha aktivitetet në fushën e këshillimit të menaxhimit si dhe në fushën e biznesit dhe teknologjisë së informacionit, në veçanti këshillime, trajnime, shitje të pajisjeve dhe programeve kompjuterike, prodhim i të gjitha llojeve të produkteve.

MHP Management und IT Beratung GmbH është një filial i zotëruar plotësisht nga Dr.Ing. h.c.F.Porsche Aktiengesellschaft, shoqëri pjesë e Grupit Volkswagen i cili drejtohet nga ndërmarrja mëmë fundore e grupit, shoqëria Volkswagen Aktiengesellschaft (Volkswagen AG). Grupi Volkswagen operon në Shqipëri përmes shoqërive të zotëruara indirekt prej tij: Porsche Albania SHPK, Porsche Mobility SHPK dhe Porsche Leasing SHPK.

Pala 2: TransnetBW GmbH është një shoqëri me përgjegjësi të kufizuar, e themeluar sipas legjislacionin gjerman, me objekt aktiviteti sigurimin dhe përdorimin e rrjeteve të transportit, në veçanti ndërtimin dhe funksionimin e rrjeteve të transportit për transmetimin e energjisë dhe substancave që përmbajnë energji.

TransnetBW GmbH është në zotërim të plotë të EnBW Energie Baden-Württemberg AG, shoqëri aksionare, e themeluar sipas legjislacionit gjerman dhe nuk ka filiale të regjistruara në Shqipëri.

Joint Venture do të jetë një shoqëri me përgjegjësi të kufizuar, e krijuar sipas legjislacionit gjerman, me objekt aktiviteti ofrimin e shërbimeve inteligjente të sistemeve të energjisë, për klientët e palëve të treta në Gjermani dhe pjesën tjetër të Evropës.

Më datë 26 shkurt 2021 palët kanë nënshkruar “Marrëveshje Konsorciumi”, për krijimin e një ndërmarrje të përbashkët (joint venture) me funksione të plota.

Palët pranojnë të themelojnë një shoqëri me përgjegjësi të kufizuar, ku secila nga shoqëritë MHP Management und IT Beratung GmbH dhe TransnetBW GmbH do të zotërojë 50% të kapitalit themeltar të shoqërisë së përbashkët.

Njësia e biznesit IE2S, pjesë e shoqërisë MHP Management und IT Beratung GmbH do të transferohet tek shoqëria e përbashkët Joint Venture.

Shoqëria e përbashkët (Joint Venture) do të ofrojë shërbime këshillimi në fushën e strategjisë, menaxhimit dhe këshillimit teknik (energjetik), shërbime ndihmëse në lidhje me sistemet Smart, në veçanti sistemet inteligjente të energjisë, infrastruktura energjetike dhe furnizimi me energji. Në fokus do të jenë si fillim klientët e palëve të treta në Gjermani dhe në pjesën tjetër të Evropës.

Shoqëria e përbashkët do të themelohet për një afat të pacaktuar dhe do të funksionojë si shoqëri e pavarur në treg, do të ketë emrin e vet të ndërmarrjes, shenjat e markës tregtare, menaxhimin etj.

Vlerësimi i konkurrencës

Transaksion i njoftuar plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit u konsiderua tregu i konsulencës, implementimit dhe shërbimeve IT në

sistemin e energjisë, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur dhe treg përkatës gjeografik do të konsiderohet territori i Republikës së Shqipërisë.

Transaksioni i njoftuar është krijimi i një ndërmarrje të përbashkët me funksione të plota nga shoqëria MHP Management – und IT Beratung GmbH dhe shoqëria TransnetBW GmbH.

Shoqëria MHP Management – und IT Beratung GmbH, nuk operon në Shqipëri por është pjesë e Grupit Volkswagen, i cili realizon të ardhura në Shqipëri përmes shoqërive të zotëruar indirekt prej tij: Porsche Albania SHPK dhe Porsche Leasing SHPK. Shoqëria TransnetBW GmbH zotërohet tërësisht nga shoqëria EnBW Energie Baden-Württemberg AG, e cila nuk ka filiale dhe nuk ka realizuar xhiro në Shqipëri.

Shoqëria Joint - Venture nuk do të operojë në Shqipëri.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dh për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet krijimit të një ndërmarrje te përbashkët, me funksione të plota nga shoqëria MHP Management – und IT Beratung GmbH dhe shoqëria TransnetBW GmbH.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS